

三吳醫案 卷壹貳

目列篇以

赤水玄珠全集

諸縉紳名家贈文

贈太醫東宿孫君序

蓋士君子有濟世之心者必託經世之術以運之遇不遇無論也何也得時而駕則宇內之休戚利害隱然共之視其患若切於身之疾痛疴癢不措之安全不止此士君子之心得位以行之者也不幸不獲遇澤不及物而心不得施有志君子往往懷其道而隱於醫故是昔人謂濟人利物無位者不能惟醫以救死扶生爲功故業之者可以推不忍之心及於物而於道有益有味乎其言之也然醫豈易言哉吾聞其宗旨自內經本草以來書之藏於有司者一百七十九家非博通鉅儒超悟上哲顯攻其業何能探討洞明其陰陽寒熱靜燥虛實消息盈縮之奧而措之行事夫人之待命於醫生死攸係迺以未諳淺薄者嘗試之其不賊人之命者幾希醫以濟人至於賊人可不畏耶此醫之所以難言也余頃多病謁告山居嘗嘆濟物之衷未措於用顧思延醫以求濟其身然而醫之良者苦不一遇也迺壬申秋仲吳君柳溪譚新安海陽有孫君東宿者醫可謂稱良矣余亟請而相印證之耳其論渢渢乎素難之旨而表裏夫張劉孫李丹溪伯仁諸家其視余疾也未投藥先譚余之經絡色脉機能與受病之自即勿藥而余病爽然若失及詳察其端方之度沉著之思淵淵之聞奧則杳焉莫竟其涯非所謂深於道而隱於醫者耶余因詰之曰神農嘗百草先天而命之藥黃帝岐伯後天而著之經此天以神授聖以神符不可及矣嗣後若和扁華佗淳于意仲景邈河間東垣朱滑莫

不鑿弄化機制人命於掌上術亦神也何今之事是業者不能踵其芳躅耶抑世代之不同也孫君勃然曰古今人非不相及用心殊爾宋儒有言古之仕者爲人今之仕者爲己不佞亦謂古之醫者爲人今之醫者爲己道不同而受病一也夫士君子之視天下與吾身血脉相流通天下病若痼瘕之切身天下安則愜然而無恨雖以道爲藥石者其濟宋以醫爲道術者其濟狹其心一也故古之醫也以救死扶生爲心其業專而用方也慎專則精而造詣入室慎則審而投藥奏功此和扁諸名家所以悉臻秘妙稱神奇今之醫則異是也將以市利非以濟人黃岐以來諸書非不剽竊以資口說迺其心則實胡越一膜視天下率以利之盈誦爲心之重輕人之濟與否若與吾術不相關此何以比古人而接其芳躅哉不佞奎何能造古賢哲之閫奧第無愧於此心爾余聞而喟然嘆曰孫君充是心而行是術其將大有裨於時矣雖隱而亦顯也因次其語而歸之爰以訂夫業是術者是爲序

崑

萬歷癸酉中秋日吳江孫質庵從龍敬書於符丸草堂

醫案三吳治驗一卷目錄

萬歷龍飛二年吳小峰小川目疾

張孝廉後渠大頭疫三

鄭都諫公子痘有發明五

大宗伯董潯陽翁脾胃疾有發明七

馬尉瘧痢併發有發明九

大光祿龐太夫人寒熱頭痛飽悶十一

張思軒夫人心痺有發明十三

潘大司馬腸風十五

舜田臧公氣虛中滿十七

潘見所公半身不遂有發明十九

凌夫人孕二十一

沈別駕夫人產後發熱有發明廿三

吳北海令政經行四肢壘又發塊紅紫廿五

竹匠婦妊娠吐血胸腹脹痛有發明廿七

金妓時疫二十九

李雙痛風三十一

蔡中林內人陽明少陽合病三十三

萬歷甲戌沈中丞案二

吳江孫行人痛風有發明四

張文學子心病虛弱有發明六

董龍山夫人便血八

吳肖峰令政腹痛有發明十

光祿公痰火脇痛有發明十二

馬迪庵公內傷腹脹大小便不利有發明十四

馬鳳林內子隱疾有發明十六

金谿令君臧老夫人頭疫有發明十八

見所公白濁有發明二十

金元岩令眷產後痢二十二

吳太夫人白帶二十四

周芻王白濁二十六

李妓夢遺咳嗽二十八

曹鏗胸膈不暢三十

沈別駕門下老僕三陽合病有發明三十二

吳九宜先生早晨泄瀉三十四

沈大官左膝腫痛不能起止三十五

沈晴岳先生五更耳鳴三十六

臧六老上吐血下瀉血三十八

丁耀川令堂吐血左膀肚門互換作痛四十

金良美咳嗽吐紅潮熱右脇不能臥四十二

王祖泉令政頭痛惡寒汗出如雨四十四

溫一渠內人血虛咳嗽四十六

溫巽橋二令媳產後右脇脹痛白帶如膿四十七

溫天衢病目吐血四十八

王敬泉內眷痰嗽腹脹五十

陳春野公令愛丁奚疳症五十二

潘敬齋令媳血下筋膜如手大者一二桶五十三

張懷赤公早晨洩瀉下元虛寒五十四

蔡樂川令眷頭痛如破五十六

沈繼庵下痢脫肛 內人乾霍亂卅五

潘景宇內人頭痛作瀉三十七

臧氏婦臍邊痛下痢紅白三十九

丁文學令姊暈厥四十一

倪五娘子口眼歪邪四十三

溫巽橋子婦帶下四十五

張二娘子孕七月嘔吐不止四十九

溫南溪內人大便秘結五十一

臧七房二老夫人痢五十五

周蘆汀迺眷胃脘痛五十七

醫案一卷

明新安生生子孫一奎文垣甫輯

門人余煌

三吳治驗

子朋來全閱梓

萬歷龍飛二年小春月予始遊苕之東雙林於時族兄吉泉之友吳小峯與其弟小川俱病日專科者愈治愈重其自始紅腫次加太陽痛繼則白星翳疊出予不以目科名而識者予稱大方因謀於吉泉曰醫以通變爲良昔秦越人過邯鄲聞貴婦人則爲帶下醫過縱陽聞周人愛老人則爲耳自痺醫聞東宿君國手也必能隨俗爲變願一言去吾兄弟目疾吉泉邀予余曰嘉靖間論醫者必首西吳如周仲仁氏凌漢章氏王賓湖氏者皆擅一時名其家世必有傳也何需於予吉泉曰渠家慕弟久矣且其尊人受博士易爲西吳名家弟好易幸一往藉此爲談易地毋遜疹其脉小峯之脉濡而緩大兩目血縷直貫瞳人薄暮則疼小川之脉皆洪大鼓指黑珠有浮翳癰隱澁難開大小便皆不利故於小峯用補先以清肝散與之夏枯草五錢香附四錢甘草一錢五分細茶五分以徹其痛藥兩進而痛止繼用人參白茯苓熟地黃枸杞子桂心牛膝破故紙白蒺藜牡丹皮服八日而愈於小川用瀉內用瀉肝湯及當歸龍會丸外用象牙冰片爲末點之七日全愈其尊君我峯翁喜詣予曰二日均病年同齒染同時諸醫同治而同不愈先生一補一瀉而二病均愈何哉余曰此陰陽虛實之辨也經云實者正治虛者從治令姪之症惟厥陰肝火熾盛肝嘗有餘有餘者瀉之正治也耶君下虛又爲怒所激怒則

火起於肝肝爲藏血之地故血絲貫瞳人而薄暮作痛方用夏枯草香附爲君疏其肝氣經云肝苦急急食甘以緩之故用甘草爲臣茶能清頭目用以爲使先爲去此痛經又云水流濕火就燥故復用甘溫補其下元之虛俾火得歸原此從治也若用苦寒降火之劑不惟血凝而痛加抑且激其火而使愈熾矣我峯聞之語人曰孫君本陰陽而治寒熱是用易爲醫也故補者補効攻者攻効語曰不知易者不可以爲太醫孫君神於易而於醫乎何有願於吾苕懸一壺也余哂之謂昔韓伯休且不欲人間知其名余又何壺之可懸哉一

萬歷甲戌其年自仲秋徂冬瘡子盛行三月內予所治男婦嬰孩共七十二人苕之望族沈最著大中丞觀頤公當考功時幼君瘡喘嗽不寧聲啞發熱洩瀉斑紫不歛予以小無比散愈之夫人妊腹痛昏厥者五日名醫如高陳二公者沈姻婭無巨細悉任之亦不能措手予至診之兩手脉皆洪大法當下衆僉以妊難之予曰經云有故無殞亦無殞也妊已九月將解即胎動奚傷若當下不下不獨其痛難忍而變且不測考功是予言而請藥予卽用小承氣湯加蘇梗砂仁下之而安考功偶冒風頭痛倦怠發寒熱如癰脉浮絳而數予曰此小柴胡湯症也一劑而瘥考功請告家居者二十年篤好方書予初之苕苕人未知予考功聞予亟欲識之謂予治病甚奇又與予論傷寒痘疹胎產皆中窾深然之語人曰良相良醫等爾如孫君所詣卽千金不足爲其重特譔醫說書於冊以不朽孫君云二

張孝廉後渠丁年患大頭疫頭大如斗不見項唇垂及乳色如紫肝昏憤不知人事

見者駭而走其年疫甚癘人畏傳染至廢吊慶張與考功公子同受春秋於會稽陶春源所陶邀予診之其脉皆浮絃而數初以柴胡一兩黃芩玄參各三錢薄荷連翹葛根各二錢甘草一錢服三劑寒熱退絃脉減但洪大予知其傳於陽明也改以貫衆一兩葛根天花粉各三錢甘草一錢黑豆四十九粒一劑腫消其半再劑全消漿粒不入口者二十一日再與小柴胡湯兩劑服之始納乾糕如指者兩條次日進粥而漸平矣丁酉秋聞報捷三

吳江孫質庵老先生行人時患痛瘋兩手自肩顫及曲池以至手梢兩足自膝及跟尻腫痛更甚痛處熱飲食少請告南還而伏蓐者三年里有吳君九宜者沈考功西席也見予起後渠疾因語行人逆予診其脉皆絃細而數面青肌瘦大小腿肉皆削予與言此病得之稟氣弱下虛多內以傷其陰也在燕地又多寒經云氣主煦之血主濡之今陰血虛則筋失養故營不營於中氣爲寒束百骸拘攣故衛不衛於外營衛不行故肢節腫而痛痛而熱病名周痺是也治當養血舒筋疏濕潤燥使經絡通暢則腫消熱退而痛止矣痛止即以大補陰血之劑實其下元則腿肉復生稍愈之後願加珍重年餘始可出戶行人聞而喜曰果如公言是起白骨而肉之也吾即未藥病似半去惟公命劑予先以五加皮蒼朮黃柏蒼耳子當歸紅花以仁羌活防風秦艽紫荊皮服之二十劑而筋漸舒腫漸消痛減大半更以生地龜板牛膝蒼朮黃柏晚蚤沙蒼耳子以仁海桐皮當歸秦艽三十劑而腫痛全減行人公益喜予曰病加於小愈公下元虛憊非歲月不能充實古謂難足而

易敗者陰也須痛戒酒色自培本根斯飲藥有効而沉疴可除據公六脉輕清流利官必腰金願葆真以埃之萬毋自輕來春氣和可北上也乃用僊茅爲君枸杞子牛膝鹿角膠虎骨人參爲臣熟地黃黃柏晚蜜沙茯苓蒼耳子爲佐桂心秦芫澤瀉爲使密丸服百日腿肉長完精神復舊又喜語予曰貧官何以稱報譔次公濟人澤物盛德於沈考功冊後以彰盛美云後十年行人官至江西副憲四

鄭都諫春寔公長君四歲患痘稠密煩燥醫者星羅皆以爲熱盛不退形枯色紫頂有焦勢症逆必不可爲將辭去予至細觀之見兩太陽圓淨神氣蒼厚謂當急爲涼血解毒用赤芍藥生地黃各三錢紫草二錢連翹黃芩貝母山查木通各一錢蟬退甘草各五分藥成劑而衆止之曰麻要清涼痘要溫故博愛心鑑以保元湯爲良吾儕將劑而進之乃公獨主寒涼保元之謂何予曰用藥貴對症保元湯良矣必血活熱清而後可用今血熱毒盛而用溫劑是火熾添油也衆曰若慮毒未解吾芎藭法甚佳用桑虫雞冠血酒調服之痘即立起而慎氏王氏茅氏皆莒上專門名家亦以爲言予曰此法亦可用於清解之後經曰諸痛瘡瘍皆屬心火火未退而用是以毒攻毒其勢愈熾予故欲先清解而後保元也惟楚銅壁山人黃桂峯者治痘高手也獨語鄭公曰孫公之劑實與症對衆論皆膠固不達變者第恐清解之劑用遲一日爾試煎服之以觀其後鄭公命僕速煎衆猶持議曰如必服此劑亦當揀去貝母山查鄭公聽其減去至夜予始聞隨語桂峯曰減去二味恐七八日後不能無它症桂峯曰何以故予曰此痘內傷外感俱未清楚今帶熱

而出故其腹猶膨脹去貝母恐搶喉去山查恐洩瀉七八日痘毒出盡腹內空虛變從虛出諸君素以痘專科何不慮及此其夜服藥後即啞然而睡天明痘色明潤焦頂盡退血亦漸活惟嘔噦搶喉衆又以昨日之劑太寒所致予曰此火毒未盡徹也宜進竹茹湯而慎雲峰怫然曰吾家世世業痘年亦七十有五曾未見治痘用竹茹者春實公令弟樂津公檢痘疹全書用竹茹者以正慎語塞悻然而去藥進而嘔止至八日果洩瀉發痒予以保元湯加白朮以治瀉大加何首烏以止痒一帖而痒止至十四日天庭兩顴皆回漿作靨惟兩頤漿未回洩瀉不止予因偶出北門半日歸見其口開項軟手足痘氣盡瀉腹又作脹已成內攻舉家啼泣予亦茫然不遑爲計嘆息出門樂津公把而送之少間揖別而聞衣間痘臭語樂津曰公聞臭乎曰聞予曰似有生意亟還起之予思兩頤乃腎經部位獨不回漿者腎元虛也峻補腎元庶可使活先以紫河車一錢用酒漿調服固其元氣服後即睡繼以人參一兩黃芪兔絲子各三錢作大劑服之一日夜服人參一兩八錢黃桂峯是夜自松江還時已四鼓亟叩門而入鄭語之變且告之服藥黃曰埃吾看作何狀見其結靨之下腹灌一線黃漿贈痘盡起桂峯曰萬全矣非孫公不能起此病桂峯由此益昵予出必聯舟歸則同楊相印正者三年鄭公感予而作序以贈親書孫憲副公冊後識不忘也五

張文學子心二尹可泉公長君也自知醫弱冠病吳下名醫皆診之僉曰療治久不効子心亦自分必死督家人具秘器已沐浴衣襁衣而臥正寢斷粒絕藥者二日

可泉聞予治其高第張星岳之孀奇因訪予曰病心痺而尸寢浹旬者能起之誰不嘖嘖稱公高手吾子病且革幸憐而診之予至診其脉左寸短弱右關畧絃餘皆洪大其症咳嗽下午熱從兩足心起漸至頭面夜半乃退而色青形羸氣促多夢遺交𪔐臥床褥奄奄一息耳時則七月初旬也診畢語可泉公曰郎君病可治不宜豫凶器也可泉公曰諸醫僉謂火起九泉者十不救一大肉盡削者死咳嗽加汗者死脉不爲汗衰者死又當砭鑠石流金之候又恐肺金將絕豚子亦自謂無生理先生何言可治也予曰汗多者孤陽幾於飛越也可泉公曰飛越亦死候也予曰幾者將成未成之辭也症雖危其色其聲音其脉尙有生意終不可以一凶而廢三善兩顧不赤心火未焚也聲音不啞肺金未痿也耳輪不焦腎水未涸也相書云面青者憂疑不決左寸短者心神不足關畧絃者謀爲不遂夫心者萬事萬化之主內經曰主明則下安主不明則十二官危又肝主謀爲胆主決斷謀爲不決故色青症與色與脉皆非瘵也蓋郎君志願高而不遂其欲殆心病非腎病也經曰色脉相得者生予故謂郎君之病可起也病者聞言明目語其父曰吾今猶寐者初寤矣從來未有此論沁吾心脾也吾病由星士許決科於癸酉是年予落第而同窓者中故怏怏至此先生得吾心於色脉神矣此言可當藥石謹拜命予爲定方煎方名調肝益神湯以人參酸棗仁龍骨爲君丹參石斛貝母麥冬五味子爲臣山梔香附爲佐服二十帖而病起丸方則大龜板熟地黃枸杞子人參麥冬五味茯苓密丸服三月而精神健肌肉完次年生女可泉公莒中名士奇

予治而延譽聞於大宗伯董澤陽公宗伯交驩余者由可泉公始也六

大宗伯董澤老年六十七有脾胃疾翁以過啖瓜果而胸膈脹痛時當處暑也延予

治其脉寸關絃緊觀其色神藏氣固翁門下蔣虹橋沈樂閒者多藝人也翁素

親信二公詰予曰症脉何如予曰症脉雖胸腹腸痛然易瘳也二公曰翁生平不

能素食食輟瀉今不茹葷者半月燕居好奕好看書好作詩文即盛暑亦手一編

不言倦日永亦不瞋今不親筆硯者月餘不櫛沐者七日它一切無所事事極

矣諸名家如沈竹亭沈春宇金樗丘者劑備嘗之無益也而公何言易予曰諸公

不過用二陳平胃加山查麥芽等消導劑耳與症何涉蓋翁傷於瓜果而爲寒濕

淫勝經云寒淫所勝治以辛溫然瓜果非射香肉桂不能消此諸公所以不能愈

翁疾也予以高良姜香附各一兩爲君肉桂五錢爲臣射香一錢爲佐每服二錢

酒調下之藥入腹胸次便寬再而知餓三服而巾櫛交接賓客如未病者翁語沈

蔣曰孫君所見所養度越諸人若是往聞治張氏子氣絕兩日而能活之今於活

吾病益信誠臨菑虢國之遺特書一軸以彰其高因以紀一時之良遇云七

大宗伯郎君董龍山公夫人爲憲副茅鹿門公女年三十五而病便血日二三次下腹

不疼諸醫診治者三年不効予診之左脉沉濡右脉漏出關外診不應病予竊謂

血既久下且當益其氣而升提之以探其症迺用補中益氣湯加阿膠地榆側柏

葉服八劑血不下者半月彼自喜病愈矣偶因勞而血復下因案前藥予語龍山

公曰夫人之病必有瘀血積於經隧前藥因右脉漏關難憑故以升提兼補兼澀

三 醫 案 卷一
者以探虛實耳今得病情法當下而除其根也龍山公曰三年間便血雖一日二三下而月汛之期不爽每行且五日如此尚有瘀血停蓄耶予曰此予因其日下月至而知其必有瘀血停蓄也經云不塞不流不行不止今之瘀實由塞之行也不可再澁古人治痢必先下之亦此意也公曰明日試卜之予曰卜以決疑不疑何卜公隨以語夫人夫人曰孫先生非誤人者識見往又出尋常宜惟命蓋夫人讀書能文聰明謀斷不啻丈夫故言下便能了悟即用桃仁承氣湯加丹參五靈脂荷葉蒂水煎夜服之五更下黑瘀血半桶其日血竟不來復令人索下藥予曰姑以理脾藥養之病根已動俟五日而再下未晚也至期復用下劑又下黑瘀如前者半繼以補中益氣湯參苓白朮散調理全愈八

大宗伯董潯老門下有馬廚者七月初旬病病二十餘日愈劇而勢甚獷時宗伯對余奕正酣而蔣虹橋沈樂閒報曰馬廚危在旦夕宗伯聞之推枰嘆息曰吾命吾命予叩其故語曰能廚者不下二十人獨此廚適吾意將恃之以怡晚節今病不可起奈何予詰何病翁顧蔣與沈曰第詳道其狀蔣沈述其症大發寒熱寒至不憚入灶熱至不憚下井痢兼紅白日夜八十餘行腹痛惡心汗多神氣倦甚究其脉曰脉不吉下痢脉洪大者死細微者生今洪大逆也予曰痢固忌洪大寒熱亦非細微所宜其中必有故二公曰幸一往決之潯翁不可謂何可以細人而勞長者予曰醫寄人生死何論巨細矧事翁之人猶不可坐視不救也潯翁欣然握余手偕行至宅後橋余入門同居數十家皆執香拱立以伺診其脉察其症果如蔣

沈所言其面色微紅汗淋淋下予究病所由起渠謂過客衆廚間燥熱食瓜果菱藕過多晚又過飲御內而寢於樓簷之下次日即寒熱腹痛因而下痢雖得其病情尚未融通一治法因沉思之不覺行至橋而潯老猶立而候予見予無齟容知病重遂置之因如前握余手而回蔣沈謂予可治否予曰微幸先生寵靈偶有一得迺背水陣也人參白朮石膏滑石各五錢知母炮姜各三錢大附子炙甘草各二錢作一大劑煎之蔣沈將問予潯翁即命近侍煎於其側不欲蔣沈問也熟則付飲之飲訖即睡老先生曰服後何狀爲佳予曰倘得一睡則陰陽始和利則汗可歛而寒熱嘔惡可止也蔣沈曰聞已睡矣明日已刻二公鼓掌來言夜來痢減半汗吐全無脉亦歛矣再用人參石膏白朮芍藥滑石各三錢炮姜肉桂知母各二錢炙甘草附子各一錢服後瘥止痢又減半飲食漸進神氣漸轉改用白芍藥酒炒五錢人參白朮滑石各二錢甘草陳皮炮姜肉桂各一錢三劑而痢全止飲食加漸就安矣蔣沈問曰公寒熱均投此爲何症而劑何名也予笑曰此潯公所謂混沌湯也潯老又問予對曰經云夏陽於暑秋必瘧痢白虎湯益元散皆解暑之劑瓜果寒涼傷其中氣酒後御色損其下元附子理中湯正所以溫中補下者內經文云實者邪氣實也故以白虎湯益元散應之虛者正氣虛也故以理中湯應之若以寒熱均用爲疑而張仲景附子甘草瀉心湯旣用大黃黃連又用乾姜附子此何說哉蓋假對假真對真也潯翁躍然喜曰先生惟是故能起垂斃之人而生之余詩冊中臨菑虢國之談非虛語矣九

吳江吳太僕長君肖峰令政太宗伯董潯老次女也患咳嗽體倦多汗腹痛呻吟不絕口者半月吳江之醫不効訪遠近名最著者如姑蘇盛氏後湖王氏后山震澤沈氏竹亭先後遞治之而痛愈加予適寓苕城龍山公邀予乘快舡兼程而進至則診其脉左手三五不調右手沉絃面色青而息甚微腹中漉漉有聲予因問上年夏月曾病否肖峰曰曾頭痛體倦多汗動止無力不能親事但不咳嗽不腹痛今五月初病如上年而市醫謂傷風所致用參蘇飲表之始咳嗽沈爲其清嗽則加腹痛王與盛謂通則不痛以沉香滾痰丸下之則勢憊而不可支予方殫思謂此迺注夏病仲景謂春夏劇秋冬瘥者是也而龍山公詰問注夏何爲咳嗽予曰原不咳嗽由參蘇飲而咳嗽也汗多又重發汗肺金受傷故燥而嗽何爲腹痛予曰原不腹痛因治嗽而寒其中氣腹故痛也後事者又不究其因寒而痛乃謂通則不痛而用寒涼滾痰之劑重傷其中氣不思五月六陽之氣皆散於外汗而又汗汗多則亡陽夏至一陰將萌腹中尙虛虛而復一下多則亡陰陰陽俱亡不憊何待予欲酌一方以起之恐從事者又將議其後龍山促之乃用酒炒白芍藥五錢甘草黃芪各三錢桂枝二錢大棗二枚水煎臨服加飴糖一合吳下諸公果羣然又辨龍山公曰不必辨病者望此以甦其生速煎飲之飲訖而睡自已至中不醒先事者皆搖首命僕急携藥囊將去且語龍山公曰奪令妹之速者孫君也本草云夏不用桂伐天和也諸痛不補助邪氣也故一飲而不醒吾儕行矣龍山公以其言詰余因詰病者之熟睡予曰所喜者以其睡也睡則陰氣生陰生則汗可

欬痛可止也假令藥不對症安得有此又詰所投之劑何名予曰此仲景小建中湯也出金匱要畧蓋建者立也中者陽明所主今腹痛如縛帶脉急縮也東垣治例腹痛以芍藥爲君惡寒而痛加桂甘草緩帶脉之急縮用以爲臣經曰急者緩之面青脉絃肝氣盛也肝屬木木盛則脾土受制而又誤下因傷之極故痛之猛也經云木得桂而枯佐以黃芪伐肝補脾又能欬汗止痛此建中之所由名也語未竟內報病者醒而索粥予曰與之穀氣進則有本矣粥後又睡至天明腹全不痛惟稍咳嗽加五味子麥門冬兼治注下而全瘳焉龍山公述病之始末劑之藥味報大宗伯宗伯公致書於予曰足下以四味之常藥振不起之危疴名震三吳聲溢兩浙昔宋景濂爲朱丹溪立傳吾固不敏幸先生以所治節條付之俾序以傳於後俾工是術者有所藉手予憮然語龍山公曰何修而得老先生寵幸之深也第令妹被尅伐太過陰陽俱亡今病雖愈而脉絃不退猶可爲慮幸叮寧戒暴怒節飲食謝去人事恬澹多補庶可永年不然亥月陰極陽生恐不能保無患也慎之慎之後至期與肖峰齟齬怒而絕藥果以凶聞莒人多予之直與先見云十

大光祿龐公子遠吳江人也其太夫人病頭痛惡寒胸膈懣且痛時發寒熱吳醫王后山者有時名吳人最所篤信延治五日不瘥聞予居吳禮致爲治診其脉右滑大左浮絃而數問服何劑光祿公曰不識而有藥在予視之偶失言曰左矣時有西席項姓者聞言而厲聲曰此三吳最名士也渠發劑而有議者輒面唾之幸不在爾予笑曰渠是而議者非則當唾人渠非而議者是自唾且不暇何暇唾人四

物湯玄胡索牡丹皮香附子養血調經劑也太夫人七十餘矣而有經可調哉投劑之左由生平守常套而不知因人因症隨俗爲變也項子曰此何症予曰仲景有云頭痛惡寒外感病也浮絃而數胸膈懣痛少陽脉症具在右脉滑飲食滯而爲痰彼用當歸地黃芍藥皆滯痰閉氣之味內傷何由得消外感何由得出此症只宜用柴胡湯合平胃散一二帖可瘳也項猶有言光祿公曰勿辨飲藥而涇渭明矣一飲而寒熱除再飲而胸膈泰光祿喜曰奇公名不虛附矣予私問項子何極譽王光祿曰項初受業於王未睹大方而獨是其師說多見其識之不廣也十

光祿公後有事於莊所值中秋乘酒步月失足一跌扶起便脅痛不能立晝夜不寧行血散血活血之劑一日三進閱三月服二百餘帖痛不少減因迎予治診之脉左絃右滑數予曰此痰火症也公曰否賤軀雖肥生平未嘗有痰徒以遭跌積瘀血於脅間作痛爾予曰據脉實痰火也痰在經絡間不在肺故不咳嗽而亦不上出脉書云滑爲痰絃爲飲予據脉而認痰火如瘀血脉必沉伏或芤或濇也面色亦必帶黃前諸君以瘀血治者百徇公言不以色脉爲據且多服峻厲剋伐破堅之劑無効此非瘀血之積明矣公欣然請藥即用大瓜蒌帶殼者二枚重二兩研碎枳實甘草前胡各一錢貝母二錢與四帖公以爲少予曰愚見猶以爲多此症服此一二劑可瘳又即我製補益之藥可也公得藥一更矣仍前服五更腹中澆又有聲天明大瀉一二次皆痰無血痛減大半再服又下痰數碗許痛全止